

**Nunatsinni sulisoqarniarnikkut sulisussarsiortarnermi aamma sulisunik atatitsiinnarnissamut pissutsinik Naalakkersuisut qulaajaanermik suliaqartitsinissaannik Inatsisartut aalajangiiffigisassaattut siunnersuut. Qulaajaalluni suliap pingaartumik sammissavai inuiaqatigiittut ingerlatsinermi pingaarutillit suliffeqarfiit, soorlu peqqinnissaqarfik, atuarfeqarfiit, inunnik isumaginnittoqarfiit il.il., aamma ilanngullugu saqqummiunneqassapput suut suliniutit ingerlanneqarnersut innuttaasut suliffeqarnermut attaveqarniarnermikkut annaasaqarnissamut aarlerinaatillit. Qulaajaalluni suliaqarnek kingusinnerpaamik naammassineqarsimalluni Inatsisartunut saqqummiunneqassaaq Inatsisartut 2016-imi ukiakkut ataatsimiinneranni.**

(Inatsisartunut ilaasortat Steen Lyngø aamma Siverth K. Heilmann, Atassut)

### **Akissuteqaat**

(Inuussutissarsiortnermut, Suliffeqarnermut Niuernermullu Naalakkersuisoq)

### **Aappassaanneerinninneq**

Inuussutissarsiortnermut Ataatsimiititaliaq immikkoortoq 82-imi: Kalaallit Nunaanni sulisoqarniarnikkut sulisussarsiortarnerup sulisorinniinnartarnerullu qulaajaavigineqarnissaanut tunngasumik suliaqarnerannut Naalakkersuisuniit qutsavigiumavagut.

Sulisut paarlakaannerujussuannut aningaasartuutit koruuninngorlugit oorinngorlugillu amerlasoorujussuupput, kiisalu ilisimasanik annertoorujussuarnik annaasaqartoqartarpoq suliffeqarfinnilu ingerlatsiniarnermut sunniuteqarnerluttarluni. Taamaattumik unammilligassanik, aningaasartuutinik Kalaallit Nunaanni suliffeqarfinni sulisunik atatitsiinnarnissamut suliniutinik ingerlanneqareersunik misissuinissaq isumassarsiatsialaavoq.

Misissueqqissaarnermi sulisussarsiortarnerup iluatsilluarnerulernissaanut, sulisut paarlakaannerisa annikillisinneqarnissaanut kiisalu sulisut sivisunerusumik sulisoriinneqartarnissaannut sakkussaqalernissaq siunnerfigineqassaaq.

Taamaattumik ataatsimiititaliap inerniliineri Naalakkersuisut isumaqatigaat, taamatullu oqaaseqarlunga, Inatsisartut ataatsimiititaliap isumaqatigiittup siunnersuutaa akuerissagaat, inassutigissavara.